

## INDIANS

Ancje se si sint atôr che lis sferiis di chest an a son lis plui sclagnis de disfate di Cjaurêt in ca par vie che a costin masse che and è masse pôcs te sachete, si viôt però in dut il Friûl une sfloridure, une vivarositât, une tampiastade di sagris che al è un spetacul.

Nus displâs par chêi che a scugnivin lâ a cjapâ un sclip di soreli al mâr o une bocjade di aiar bon in mont, par colpe di atrits e duliis e pontis, ma se il restâ cjase, oltri che fâ sparagnâ une palanche nus dà la pussibilitât di scuviergi paîs, stradelis, trois, valadis, ostariis e gleseutis che o vevin pierdût di voli par butâsi te sossedarie dal savalon di Grau e di Lignan, la robe si pò segnâle ancje in ben.

Scuviergi un cjanton de nestre tiere nol è dome distraisi o fâ chilometri «par lâ fûr», ma al è scuviergi une civiltât e un popul e «lâ dentri», butâsi in muel te anime di chest popul. Une sagre, tant par dî, no je nome un mangjâ o bevi, ma al é dut: mangjâ, bevi, sunâ, cjantâ, scriulâ, balâ, ridi, cognossi e fâsi cognossi. Tune peraule, culture de plui gjenuine, che e cjape dentri chel che al dà il benvignût e chel che al rive.

Cjalant i manifescj e i tabelons e i reclams in ogni part dal Friûl, si à simpri plui la sorprese di cjatâju scrits par furlan. A àn tacât cidins cidins cul non dal paîs e dal sant e podopo a àn vût il coragjo (che al è ancje sintiment), di fâ dut par furlan.

Cenonè, dopo di vê passût il cûr a cjalâ cheste vierte di furlanetât, nus ven un grop spiculant a font il stamp de sagre. Sot di un grant titul par furlan, si viôt cîl e inglês e merecan e nons stranis di cjantants e di complès. E cussì il furlan, che al jere jentrât cul prin cricâ de sagre, al sparìs cul prin pivotâ de cuarnete. Se no si à cualchi messe par furlan, fate plui par tirâ dongje int che no fedêi (vadì doprade ancje chê), il rest al è dal talian in là. E i furlans, come simpri, a meti timp, oris, riscjos, sudôrs, vitis, cavîi, rabiis, cjochis par fâ balâ la simie.

A chest pont si podarès ancje sierâ disint che dute cheste floridure e je picjade sù pai mûrs ma no esist te crepe e tal cûr de int. Ma no volìn jessi triscj. Disìn invece che il furlan, ancje tes sôs manifestazions plui gjenuinis, sicu une sagre o un perdon o une fieste di paîs e di borc, tratant di fâ vignî i foescj al met sù dutis lis plumis, usance i Indians. Par un ecès di pudôr e un scrupul di ospitalitât, al dà vie il so paîs e la sô fieste par fâ stâ contents i foescj, tacant dai talians. Al cjape, sì, un franc, ma a presit de sô anime.

Al sucêt precîs che in Americhe, là che i siorons a van tes riservis e ur pain ai Indians ce che a vuelin, baste che a cjantin e che a balin. In chest câs però il balâ e il sunâ dai Indians al scuèn vê savôr o di baracon o di muart. Di baracon, se lu fasin tant par fâ; di muart, se dentri di sè a

sintin cetant in bas che a son colâts. Pa la cuâl nus semee che chel Indian Munro, rivât ca dal Canada, salacor cence nissune tristerie nus à fate une biele predicje regalantnus il Totem Pole: i Indians de Americhe ai Indians di chenti.

I Ebreos, popul che al à un grum di parentât cui furlans par cont di vitis, a àn vude la tentazion e l'invît di cjantâ lis lôr cjantis co a jerin vie par Babel, depuartâts. Cualchidun (and è simpri stâts e in ducj i popui) al varà fate frae cui nemîs a pene dismantât jù de carete. Ma la pluritât dal popul, cjalant l'aghe dal grant Flum che e semeave menâ lontan lagrimis e sperancis, a àn rispuindut: «Cemût si puedial cjantâ lis cjantis dal Signôr tun mont forest?». O che i Ebreos a sintivin di cûr lis lôr cjantis o che noaltris o sin plui bulos di lôr e o rivin a cjantâ compagn.

Peró almancul dopo passade la sagre, cuant che si fasin i conts, provìn a domandâsi se chestis fiestis, chescj cjants, cheste ligrie e à di jessi par contentâ cheiâltris o par passi il nestri cûr insieme cun cheiâltris, di ospits.

No si dîs di no fâ sagre, anzit. Ma la sagre e à di jessi, tal gîr di un an, un dai moments plui alts che un popul al palese la sô anime e le nudrîs parie, cjapant simpri par ripiâ la paronance de sô culture e de sô storie e clamant ancje i foescj a partecipâ des sôs riscjecis. Che s'al è dome un moment e tradît ancje chel, 'nant crepâ tun cjanton cun dignitât che no fâ ridi il mont vistûts di paiassos e sunant a paiament.